



#### **4. Tschanteda dal cussagl cumünel in marcaldi, ils 19.2.2014 a las 19.00 in chesa cumünela S-chanf**

**,Presidi:** Duri Campell

**Preschaints:** Gian Andrea Bott, Paolo Bernasconi, Jnes Barblan, Liun Quadri

**Absaints:**

**Actuar:** Duri Schwenninger

---

#### **Tractandas:**

1. Protocol
2. 0.211 Dumandas da fabrica
3. 0.123 Delegaziun per radunanza generela OEE
4. 0.210 Der procura in connex cun trattativas „proget amplificaziun e sanaziun lingia d’ota tensiun Pradella-La Punt Chamues-ch“
5. 9.420 Surdeda chamanna Muotta Pitschna
6. 6.500 Kohler Martin, dumanda per sustegn finanziel concept nouva lingia trafic public, S-chanf – Varusch
7. 0.122 Tscherna cumischiun festa president dal Grand cussagl
8. 9.999 Varia

La glista da tractandas vain approveda sainza objecziuns.

**Protocol:** Il protocol da la tschanteda dals 05.02.2014 vain approvo unanimamaing.

#### **21 0.123 Delegaziuns Delegaziun per radunanza generela OEE**

A la radunanza generela da las OEE, chi ho lö als 28 favrer 2014 a Cuira, piglian part per nossa vschinauncha: Duri Campell, Gian Andrea Bott e Liun Quadri.

#### **22 0.210 Contrats e cunvegns Conceder procura in connex cun trattativas „proget amplificaziun e sanaziun lingia d’ota tensiun Pradella-La Punt Chamues-ch“**

La firma Swissgrid SA ho l'intenziun da fer ün schlargiamaint da la lingia d’ota tensiun da 380-kV da Pradella fin La Punt. La publicaziun es gnida fatta ils 10 favrer 2014. La strategia da la giunta dals Cumüns concessiunaris OEE es, da raggiundscher in connex cun quist proget ün’amegldraziun remarchabla da l’ambiant in Engiadina. La giunta vules però tuottüna fer opposiziun dal proget cun l’intenziun da raggiundscher illas trattativas, cha tuot las lingias da la val traunter La Punt-Chamues-ch e Scuol/Pradella

taunt da 16'000 kV scu eir da 60'000 kV vegnan missas suot terra e cha la Swissgrid fess eir ulteriuras investiziuns a bön da l'ambient in Engiadina. Per esser flexibel illas trattativas e per pudair reagir svelt, schi fo dabsögn, stu la giunta avair la cumpetenzza da decider davart ils detagls da las pretaisas ed eir davart il retrer pretaisas, scha que pera serviziaivel ed a bön da la chosa. La forza saro taunt pü granda, scha bgeras vschinaunchas sustegnan quista strategia. Il cussagl decida unanimamaing da surder al giurist da la giunta, a Not Carl, la procura per fer las trattativas bsögnaivlas.

**23 9.420 Stabels da la faculted finanziaela  
Surdeda chamanna Muotta Pitschna**

Il cussagl piglia cugnuschentscha da 2 dumandas per surpiglier la chamanna in Muotta Pitschna, siand cha l'utiliseder fin co es mort. Il cussagl piglia cugnuschentscha da la dumanda da Rico Freiburger ed üna dal figl dal trapasso, Rafael Frigg. A vain fat la proposta da na surder la chamanna, dimpersè d'elavurer il prüm ün reglamaint da chamannas. Il cussagl decida cun 4 cunter 1 vusch da surder la chamanna Muotta Pitschna a Rafael Frigg, siand cha quel ho güdo a sieu bap barmör cun lavuors da mantegnimaint. Quista pratcha es adüna steda üsiteda a S-chanf. Reguard l'annunzcha da Rico Freiburger nu po quella gnir resguardada, siand cha'l trattamaint eguel nu füss co pü garantieu.

**24 6.500 Trafic public  
Kohler Martin, dumanda per sustegn finanziael concept nouva  
lingia trafic public, S-chanf – Varusch**

Il cussagl piglia cugnuschentscha da la dumanda da Martin Kohler reguard ün sustegn finanziael da fr. 51'000.00 per sustgnair il concept per üna lingia da trafic public da S-chanf fin Varusch. Quist concept füss ün access turistic per tuot la regiun, spezielmaing pel Parc Naziunel. Ils giasts gnissan transportos cun ün trenin sün roudas, 8 voutas davent da S-chanf Staziun e 2 voutas davent da Prasüras fin Varusch. Il Parc Naziunel e'l circol nu stustegnan l'ideja, l'uffizi chantunel per energia e trafic invezza füs pront da sustegner la spüerta cun ün temp da prova da 2 ans, scha nossa vschinauncha sustegna eir quist'innovaziun. La nouva lingia da trafic public gniss spüerta dals 19.06.2014 fin ils 26.10.2014. Martin Kohler ho inoltro ün concept, scu eir üna calculaziun ed ün rendaquint. Tenor la calculaziun dess que ün manco da fr. 51'000.00 per stagiun. Quel manco gniss spartieu sü traunter l'uffizi chantunel cun fr. 20'000.00 e la vschinauncha da S-chanf cun fr. 20'000.00. Il cussagl decida cun 3 cunter 2 vuschs da propuoner a la radunanza cumünela da deliberer il credit ill'otezza da fr. 60'000.00 per ün temp da prova da 3 stagiuns.

**25 0.122 Cumischiuns  
Tscherna cumischiun festa president dal Grand cussagl**

Duri Campell es gnieu tschernieu l'avuost passo scu vice-president dal Grand cussagl. Üsito vess il vice-president da gnir tschernieu illa sessiun dal Grand cussagl in avuost scu president. La vschinauncha, inua cha'l nouv tschernieu es domicilio, ho d'organiser la festa chi ho lö la sanda zieva la sessiun, quist an, ils 30 avuost 2014. Cun que es uossa da cumanzer cun las lavuors d'organisaziun, siand chi vegn fat quint cun arduond 300 giasts. Il cussagl decida da tscherner las seguintas personas illa cumischiun: Paolo Bernasconi, Gian Fadri Largiadèr, Jnes Barblan, Gudench Campell e Duri Schwenninger.

**26 9.999 Varia**

Il cussagl piglia cun grand plaschair cugnuschentscha, cha noss'abitanta Selina Gasparin ho guadagno la medaglia d'argient als gös olimpics. Cul bunischem 8'avel rang ho raggiunt sia sour Elisa ün diplom olympic. Ad es previs d'organiser in venderdi, ils 28 favrer a las uras 19.00 ün act da festa illa sela polivalenta a S-chanf. Impü es previs d'artschaiver las sportistas sün la piazza aviatica a Kloten. Previs es cha la scoula primara fo ün cortegi da

Chalandamarz. Tuots sun amiaivelmaing invidos da fer part al viedi ed a la festa. In quel connex giavüsch'il cussagl, cha'l di da festa dessan ils abitants metter our binderas in tuot la vschinauncha.

Il president spiega, cha la Posta Ladina spordscha nouv a las vschinaunchas üna rubrica per publicher reportaschas da tschantedas dals cussagls cumünels. La vschinauncha da S-chanf vaiva aunz ün per ans renunzcho da publicher protocols, siand cha quels gnivan publichos cun sbagls u irreguler cun grands retards. L'actuar füss pront da formular ils protocols in fuorma da reportaschas, uschè scu chi'd es üsito in otras vschinaunchas e da publicher quellas a partir da dalum successiv illa Posta Ladina, zieva cha'l protocol es approvo.

Püssas reclamaziuns sun entredas, siand cha'ls trens directs da Landquart e vers Landquart nu ferman pü a Cinuos-chel. Il cussagl es da l'avis, da scriver üna charta a la Viafier retica cul giavüsch, ch'in avegnir dessan ils trens directs fermer darcho a Cinuos-chel.

Causa la situaziun actuela da bgera naiv, giavüsch'il cussagl, cha'ls viandants e sportists nu dessan pü ir dadour las sendas, aint il ed in vicinanza dal god, per cha la sulvaschina ho sieu pos. Managio sun lös, inua chi nun existan zonas da pos. Quist'infurmaziun dess gnir publichedada illas chaschas nairas ed illa Posta Ladina.

A las 22.00 vain la tschanteda alveda.

In buna fè

L'actuar:  
***D. Schwenninger***